



Mette Arqe-Hammeken  
Inatsisartunut ilaasortaq, Naleraq

**Illuliornissamut sanaartorfigissaanermut akit pillugit § 37 naapertorlugu  
apeqquteqaammut 2026-056-imut akissut**

Dato: 15-04-2026  
Sagsnr.: 2026 - 6986  
ID. nr.: 80700351

Asasara Mette

Inatsisartut suleriaasianni § 37 naapertorlugu illoqarfippaalunni illuliornissamut  
sanaartorfigissaanermut akit pillugit Naalakkersuisunut apeqquteqaateqarputit.  
Apeqqutitit uannit akineqartussatut innersuunneqarput. Apeqqutitit matuma kinguliani  
ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

**Apeqqut 1: Illuliornissamut sanaartornissamullu toqqavissiorneq assigisaallu  
qanoq agguaqatigiissillugit illoqarfiit ukunani akeqartinneqarpat:**

- a. Nuuk?
- b. Sisimiut?
- c. Ilulissat?
- d. Qaqortoq?
- e. Asiaat?

Akissut: Sanaartorfigissaanermut kommunini akit pillugit Naalakkersuisut  
paasissutissaateqanngillat.

Oqaatigineqassaaq, kommunalbestyrelsi najukkami kuuffeqarfinnut oqartussaaffimmik  
ingerlatsisuummat, aammalu kommunip killeqarfiata iluani illuliorfusimasuni pisortat  
kuuffeqarfiutaanik nutaanik pilersaarusiornermut sanaartornermullu, aammalu  
kuuffeqarfinnik pingaarnernik ingerlatsinermut aserfallatsaaliuinerullu  
akissusaasuulluni, tak. *Sanaartorfissagissaaneq, pisortat kuuffeqarfinnut  
aqqusersuutaat aamma pisortat aqqusiniutaat pillugit Inatsisartut inatsisaat, § 6.*

Apeqqut akissuteqarfigissagaanni kommuninit paasissutissanik ersarinnerusunik  
piniartoqartariaqassaaq, paasissutissallu pissarsiarineqartut nallersuullugit.  
Taamaattoqassappat tamanna nassuiaataassaaq, taamaalillunilu Inatsisartut  
Suleriaasianni § 37-p sinaakkutaasa avataaniilluni.

Illuliornissamut sanaartorfissanngortitamik qinnuteqarnermi, sumiiffimmi  
sanaartorfissanngortitamik atuinissamut akiliutissatut kommunip naatsorsugaanik akinik  
piusunik kommuni paasissutissiinnaassaaq. Akini pissutsit assigiinngitsut  
apeqqutaapput. Pissutsit akinut sunnuteqartut ilaatigut tassaapput qanoq  
annertutigisumik sanaartorfigissaasoqarsimanersoq aamma qanoq  
pitsaassuseqarnermoq (aqqusineq, imermik pilersuineq, kuuffissualersuineq,  
innaallagissamik pilersuineq, nunagissaanerit il.il.) kiisalu nunaminertamik atuineq  
(inissiatut/inuussutissarsiorfittut).

Sanaartorfigissaanermut akiliutissat naatsorsorneqarnissaannut malittarisassat, *Sanaartorfigissaaneq, pisortat kuuffeqarfinnut aqquersuutaat aamma pisortat aqqusiniutaat pillugit Inatsisartut inatsisaanni § 12*-imi allassimapput. Taanna malillugu sanaartorfigissaanermut akiliutissat naatsorsorneqarnissaannut agguassinissamut malitassaq imaluunniit nalinginnaasumik akiliutissaq kommunip atorsinnaavaa. Taakku marluullutik kommunimut pilersaarummi imaluunniit kommunip ileqqoreqqusaani aalajangersarneqarsimassapput, nalunaarutigineqarsimassallutilluunniit.

## **Apeqquut 2: Apeqquut 1-imi akit sumiiffikkaarlugit assigiinngisitaarpata, suna patsisaava?**

Akissut: Sanaartorfigissaanermut akiliutit kommunalbestyrelsimit aalajangersarneqassapput, sumiiffimmiillu sumiiffimmut annertuumik nikerarsinnaallutik, tak. ilaatigut *Sanaartorfigissaaneq, pisortat kuuffeqarfinnut aqquersuutaat aamma pisortat aqqusiniutaat pillugit Inatsisartut inatsisaanni § 12*.

Misilittakkat takutippaat, sumiiffimmi aalajangersimasumi nunaminertamik atugassiinermi sanaartorfigissaanermut akiliutissat annertussusaat kommunit naatsorsortagaat annertuumik nikerarsinnaasut. Immikkoortut ilaanni ataasiakkaani sanaartorfigissaanissamik neqeroorutigineqartut annertussusaasa annertuumik assigiinngissusaat, akit assigiinngissusaannut patsisaakkajuttarput.

Taamaattumik sumiiffiit akimorlugit akinik nallersuussineq mianersortumik pissaaq. Assersuutigalugu sumiiffiit ilaanni, pisortat imermik pilersuiviinut aamma kuuffissuinut attavilernissamut periarfissaq sanaartorfigissaanermut ilaaneq ajorpoq. Qanoq issutsit assigiinngissinnaasarput, matumani assakaasulinnut aqquutit silissusaat (illoqarfiup ilaani aqqusineq, najugaqarfissiami aqqusineq, sumiiffimmi aqqusineq), aqqusinernullu atatillugu pisinnaat, sikkilertullu aqquataannik sanaartortoqarnerisq ilanngullugu. Sumiiffiit ilaanni sanaartorfigissaaneq ikaartarfiliornermik, majuartarfiliornermillu ilaqartarpoq. Pisariaqartumik nunagissaanermi qaqqajunnamik qanoq annertutigisumik qaartiterisoqassanersq, sanaartorfigissaanerup akianut aamma sunniuteqartarpoq. Taassuma saniatigut suliffeqarfiit sanaartorfigissaasartut akornanni unammilleqatigiinneq inoqarfiit akornanni, piffissallu ingerlanerani nikerarsinnaasarpoq, taamaalillunilu akinut sunniuteqarluni.

Sanaartukkamut ataatsimut naatsorsorlugu nalinginnaasumik ilaqutariinnut ataatsinut illuliornermi akiliutit quleriinnik illuliornermit qaffasinnerusarput, tassani akulikitsunik (quleriinnik) sanaartornermut sanilliullugu siammasissunik sanaartornermi (ilaqutariinnut ataatsinut aamma uguleriiaannut) sanaartorfigissaanermi atuneq (aqquersngit, erngup aamma kuuffissuit aqquataat il.il.) atuilluarnerunngimmat. Akitigut misilittakkat nutaanerusut takutippaat, sanaartorfigissaanermi akiliutissat annertuumik nikerarsinnaasut; ataatsimut sanaartornermi illumut ataatsimut 300.000 koruunit missaannit, siammasissumik sanaartornermi illumut ataatsimut 1 mio. koruunit sinnerlugit.

Taassuma saniatigut kommunit assigiinngisitaartunik akiliutinik  
aalajangersaasinnaapput, matumani najukkami ineriartortitsinissap  
tapersersorneqarnissaa aamma siunertaralugu.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga

  
Iddimangiu Jensen Bianco